

Coro d' introduzione

La bona sera e buon principio d' anno

A tutte sti signure in compagnia!

Simmo venute e tornerammo ogne anno

Per farve chill' aurie che sapimmo.

Spilateve lli rrecchie, apritece lu core

La casa la dispensa e la cantina;

Ca cheste so ghiurnate de contiente

Se magna e beve e non se pensa a niente.

Apprimmo l'anno nuovo
Co tric-trac e botte
Passammo chesta notte
In allegria.

Nascette lu Messia
Avenne poveriello
No voje e n' aseniello
Pe vrasera.

Da tanne 'e sta maniera
Passato s'è sto juorno
Pe fa dispietto e scuorno,
A farfariello.

Ca chillo marionciello
Nce avea tutte aggranfate
Ne ce avarria lassate
E nce arrosteva.

Si ntiempo non veneva
Da Cielo lu Guaglione,
Ca p' essere sguazzone
Nce preggiaje.

tutte da li guaje
Volette liberarce.
Patenzo e co lassarce
Purzi lu piello.

Ma nuje che scurdarielle
Non simmo e mango ngrate
Passammo sti ghiurnate
A fa sciacquitto.

E lu sentire schitto
Tornà lu zampugnaro
Nce mette allummacare
Alleramente.

Nce fa venire a mente
La luminosa stella,
La bella grotticella
E li pasture.

Che gruosse e creature
Dall' angelo avvisate
Correvano priate
A la capanna.

E chi lle porte, o manna,
Co ceste e co panare,
E chi lu va adurare
A faccia nterra.

E da lontana terra
Per fine li tre magge
Cu traine e carriagge
Se partettero.

Ch' appena che vedettero
Lu cielo alluminato
Dicettero era nato
Lu Messia.

E co gran cortesia
Vediste aggenucchione
De nanze a nu guaglione
Tre regnante.

Arode, re birbante
Trasette già mpaura
Ca chella criatura
Lo spriorava.

E pecchè se tremava,
Chell' arma ntaverzata,
Fa fa chella salata
De guagliune.

Che simmele a picciune
Li ffacette scannare
Pe farece ncappare
A lu bambino.

Cchiù nfame, cchiù assassino
Nn' avite visto mai!...
E nterra non chiavaie
Tanno pe tanno.

Ma le restaie lu nganno,
Nè ce cacciaie niente
Co tutte li nuziente
Ch'accedette.

ie la Madonna avette
Da Cielo lu consiglio
De ne fù lu figlio
Tanno tanno.

Sti ccose già se sanno,
Ma quanno è chisto juorno
Nce arrollano cchiù attuorno
A la memmoria.

E sia ditta pe gloria
Nce portano allegrezza,
Tanto che c'è priezza
Pe ogni parte.

E sulo all' addonare
Che asciute so li ppigne
Te preje a chillo signe
De Natale.

Vi' mo p' ogni locale,
Pe puoste e pe pontune
Li rrobbe so a montune
Apparicchiate.

A festa so aparate,
Purzi fora li vie
Poteche, speziaria
E bancarelle.

E nne vide sportelle
Panare, votte e ceste,
E scatole, e caneste,
E gran sportune!

D'anguille e capitune
E pisce d'ogni sciorte
Ne vide grosse sporte
A centenare.

Tutta sta robba pare
Potesse abbastà n'anno,
E pure tanno tanno
Scomparisce.

La gente trase e esce,
E corre, e va, e vene
E spenne quanno tene
Pe la canna.

Nè truove chi non manna
N'aurio, o nu rialo
Sarrà malo natalo
Non mannà niente.

Lu strazio de' nuziente
Se fa co li capune
Che songo a miliune
Scapezzate.

Ne, vuie quanno trovate
Cchiù festa e cchiù allegria?
Ma la pezzentaria
Non canuscimmo.

E nuie perzò venimmo
Co festa, canto e suono
P'aurià lo buono
Principio d'anno.

Priesto che fenarranno
Li guaie e li tormiente,
Nè mai cchiù lamiente
Sentarraie.

Spero che vedarrate
Spuntà pe vuie na stella
Lucente comm' a chella
E auriosa.

Spero ch' assai sfarzosa
La sciorte addeventasse
E che ve cotentasse
A tutte quante.

Si si nuziante,
Sempe puozz' aunnare
Comm' aonna lu mare
Ntutte ll' ore.

Si po si vennetore,
E tiene magazzino
Se pozze ogni carrino
Fa ducato.

Si po si n' avvocato,
Ti dico solamente
Che puozze avè cliente
Capo tuosto.

Pecchè l' abbusco vuosto
Nce sta d' ogni maniera
O perde, o va ngalera,
O fa denare.

Puozze, si si notare,
Fa poche testamente,
Capitule e strumiente
Nzine fine.

Si nu ngegner fine?
Trovasse ricche pazzo
Pe fravecà palazze,
E turriune.

O meglio e la Commune
Aggrandite coll'ogne,
Ca llà sempe se mogne,
E se va nchino.

Si n'ommo trafechino
E vuò cagnare stato?
Rijesce Deputato
O Consigliere.

Tanno sì Cavaliere!
Si lu governo approve,
L'anema de li chiuove
Venarranno.

Sì prevete? Te manno
L'aùrio che dimane
Sì fatto parrucchiano
O monsignore.

Si sì faticatore,
Salute, forza e accunte
Accussì tu la spunta
E può campare.

Però aje da scanzare
Lu juoco e la cantina
O ncuorpe a la matina
Niente trase.

Si s'è patron' 'e case
Te scanza lo Signor
De malo pagatore
Comm' a nuie.

Che n'tiempo se ne fuie
Li tterze si nun pava,
E se porta la chiava
D' altrittante.

Si po s'è navigante,
Nn' avisse maie tempeste,
Fa li viagge leste
E ricche ancora.

S'è miedeco? bonora
Me 'mbrogliè nveretate,
Va puozzo ogne malate
Fa guarire.

Sti bobbe pozzo dire,
Si s'è nu speziale
Sanasse ogne male,
Ogne dolore.

Si poi s'è giuocatore,
Venga la carta mpoppa
Ne puozze mai fa toppa
A zecchinetto.

S' essere prutetto
Da la fortuna vuoje,
Cerca a fa quanto puoje
D'essere ciuccio.

Sì quacche impiecatuccio ?
Puozzo piglià nu terno,
Si no starraje n' eterno
Ndebbetato.

Nzomma, nqualunque stato
Avisse li rrecchizze
E chelle contentizze
Ch' addesirie.

E chi ne tene mmiria
Che pozza fa na botta
O lle scennesse sotta
Nu contrapiso.

Troppo nce avite ntiso
E ve site stufate,
E nuie simmo stracquato
E sete avimmo.

Da ccà non nce movimmo
La faccia è troppa tosta
Simmo venuto apposta
E ll' aspettammo.

Ne ch' addesiderammo ?

Castagne, fiche e nuce
E altre cose duce,
E susamielle.

Duie o tre canestrielle

Abbastano a sta panza,
Sapimmo la crianza
E simme poche.

Primma de chesso lloche

Nce aprita la dispensa,
Simmo di confidenza,
Pigliammo tutto.

O provole, o presutto

N' arrusto o nu castrato
O friddo o sta scarfato
Nu capone.

Nuie l' obbricazione

Sapimmo esattamente
Nè nce restammo niente
Pe farve annore.

Ca site nu signore

Sfarzuso e corazzone,
E ntutt' occasione
Non scomparite.

Piacere anze nn' avite
Si vanno scommorato,
E nce addesidderate
L'anno che vene.

Tanno trovà chiù bene,
Speranno cchiù allegria
E na speziaria
De cose doce.

Nce resta anze la voce
Pe ve cercà licienza,
Dann' 'a sta bona udienza
La bona notte.

E bona notte
Buon capodanno a tutte,
E bona notte.

F I N E